

Denn Apotheker muß helfen

En Bur wor in de Stadt mät sinnen Ossenwagen,
grad hat heij in de Apothek Ennött (Kartoffeln) heringedragen.
Denn Apotheker stoon noch in de Dör, —
denn Bur nohm dat Papierken vör,
wor sinne Mam had opgeschrewen,
wor det Johr dij Kartuffeln bleewen.
Aha! — heij muß gradüt, de twedde Strooten lenks,
tin Zentner nor denn Koopmann Denks.
„Adjüs, Herr Apotheker! — lott sej oj gut schmaken!
on tägent Johr well 'n wej et weer so maken!“

Nau ging heij an sin Kärr nor sinnen Oss,
on dann soll gon et gau weer loss.
Mär onsen Oss — denn had ken Senn,
stoon stur on stiw dor op sin Been.
Denn Bur nohm öm an 'ne Kopp: „Nau komm!
doj böss doch sös so lammesfromm!“
Denn Oss ken Tratt ging van de Stell:
„Ek goon nit ehrder, böss ek well!“

Denn Bur denk bej sech: Dat ös gut!
on koom son betjen all in Wut.
Heij nohm de Tögels: „Hopp! Frets, hopp!“
on gow öm mät de Schwepp wat drob,
mär rühren dej sech doch nit denn Gesell,
heij had jo ok en rechteg lären Fell. —

Denn Apotheker keek dat Spöl sech an
on had ok langsam Freud doran.
Denn Bur had nau denn Ossen an de Statt
on dräjden denn in't Rond son Stöck aff watt,
denn Oss, denn dölden alles stell:
„Ek goon nit ehrder, böss ek well!“

Denn Apotheker sej: „Nun hör'n sie mal,
bereiten sie dem Starrkopf keine Qual,
ich hole aus der Apotheke mal was ran,
sie soll'n mal seh'n, wie er dann laufen kann!“

Denn Bur wor dormät inverstoon. —
Ons Apotheker ös in't Hus gegoon
on koom bald mät en Pöttjen Salw gants schwatt,
on schmärdn dat denn Ossen ondern Statt.

Statt hoch! — — dor rennt heij wij weld loss,
denn Bur öm nit mehr haalen koss,
so flenk koss heij nit kommen nor, —
gut, dat denn Apotheker mät sin Salw noch dor!

„Herr Apotheker, kiek, dor lött heij't goon,
dat häd bloss oje Salw gedoon! —
Nau sall ons well neks anders öwerbliewen:
nau mott geij mej ok gau inriewen!“